

**COMPENDIOSAM  
ET CLINICAM CON-  
VULSIONUM PRAXIN CUM  
CAUTELIS,**

QVAM

RECTORE MAGNIFICENTISSIMO,

SERENISSIMO PRINCIPE AC DOMINO,

**DN. PHILIPPO WILHELMO,**

PRINCIPE BORUSSIÆ, MARCHIONE BRAN-  
DENB. CETERA,

MODERATORE

**DN. FRIDERICO HOFFMANNO,**

CONSILIARIO ET ARCHIATRO REGIO,  
MEDICINÆ ET PHIL. NAT. P.P. h. t.  
DECANO.

*PRO CONSEQUENDIS SUMMIS IN ARTE  
SALUTARI HONORIBUS*


Eruditorum iudicio examinique subjiciet

*d. Augusti MDCCVII.*

**M. JOANNES Gottlieb BENEMANN,**  
Brettina Saxo.

---

HALÆ MAGDEBURGICÆ,  
Typis JOHANN. GRUNERI, Acad. Typogr.








DISSERTATIO INAUGURALIS MEDICA  
DE  
CONVULSIONIBUS.  
PROOEMIUM.



 On temere humanum genus  
de fragilitate sua conqueritur,  
quod illorum vita tot casibus  
pateat, innumerisque malis,  
velut indagine quadam, clau-  
sa sit & circumsepta. Nem-  
pe enim hoc peccati præmium fuit, hoc contu-  
maciæ auctoramentum, ut ingenti felicitate  
deturbati, ultimis calamitatibus ac pœnis de-  
deremur. Longum certe foret, enumerare  
illa morborum genera, & atroces dolorum cru-  
ciatus, quorum impatientes homines exoptant  
sæpe mortem, jam non molestam amplius, &  
velut munus eam amplectuntur. Illud vero  
A luctuo-



luctuosum & lacrymabile inprimis, quod non in corpus modo tantum morbis liceat, sed quod in animum etiam, qui præsens manifestusque corpus infedit, imperium tyrannidemque sibi vindicent, indignis eundem modis deformantes. Adeo nec fatis tuta est sacra nostri pars, qua censetur homines, quam ex ingenti naufragio illo, quod primi fecerunt parentes, quasi tabulam quandam extulimus, nisi & illa iisdem, quibus corpus, malis adfligatur. Atque hanc quidem cladem convulsiones nobis maxime inferunt, quarum sævitia non totum corpus solum concutitur, sed animus etiam è sede sua quasi dimovetur. Fœda tristisque fane facies est, videre artus sacro morbo laceratos, & distorta, quæ pulchritudo commendabat, ora, tristius tamen spectaculum est, cum anima quasi commoritur, omni sensu intercepto. Omitto reliquos adfectus, qui sensum atque rationem nobis eripiunt omnem, quos non sine acerbissimo dolore ac commiseratione intuemur. Quo maiore laude is ferendus est medicus, qui non levibus tantum malis, quæ periculo vacant, sed gravioribus etiam, quales sunt convulsiones, salutarem adfert



adfert medicinam. Neque enim hic medicamentorum adparatus, vel ab Indiis usque advecta remedia valent, sed sola prudentia, quæ unice exornat medicum, in hisce morbis æstimmatur. Hæc enim ubi præsto est, curiose causas mali, quæ diversæ sunt, circumspicit conquirat & investigat, inventisque prompta remedia facillime opponit. Nam si ullus morbus, certe convulsiones medicum exercent, ejusdemque industriam prudentiamque defatigant. Quod cum subiret animum, non alienum nobis visum fuit, hoc argumentum præfenti dissertatione inaugurali paucis comprehendere. In quo quidem exequendo ea imprimis adferemus, quæ experimentis atque observationibus subfulciuntur. Deus autem, qui vitam mortemque nostram nutu temperat, cujus beneficio spiritum trahimus, adsit huic nostro conatui, ut & salus hominum & nostræ artis incrementum exinde augeatur.





CAPUT I.  
De  
*Epilepsia*  
OBSERVATIONES.

I.



Pilepsia est convulsio universalis, quæ totum genus nervosum & membranosum in consensum trahit. Habet præcipuam sedem in dura matre, quæ violento spasmo constringitur, universique inde corporis membranæ p.n. adficiuntur.

II. Distinguitur vera epilepsia à convulsionibus in eo, quod in illa inprimis cerebrum laboret, & utrique sensus, tam interni, quam externi ad tempus quasi labefactentur. Quod aliter evenit in convulsionibus, ubi salvo incolumique cerebro, partes tam externæ, quæ animæ arbitrio imperioque parent, quam internæ torquentur atque contrahuntur.

III. Est epilepsia porro vel idiopathica, sive morbus primarius, ubi cerebri membranæ inprimis adfliguntur, vel aliis accedit morbis, & tunc symptomatice vel secundarius



darius morbus adpellatur. Hæc propter mirificum illum, qui inter nervos viget, concentum atque conspirationem cerebri membranas infimul adfligit, cum non levi ægrotantis discrimine. Idiopathica chronica plerumque est, & nisi ab externa forte causa accidat, minus periculosa. Plus terrere debet symptomatologica, quod hæc acuta maxime est, & facile hominem intercipit.

IV. Patent nostro adfectui maxime omnium pueri, postea adolescentes, rarissime, qui in provectiori jam ætate sunt constituti. Eidem obnoxii sunt, qui temperamento seroso habituque corporis sunt laxo atque spongioso, quod quidem de chronica est intelligendum. Invadit symptomatologica eos, quos molli delicatoque fibrarum sensu natura instruxit, item, qui strictiore tensiori-que corporis habitu pollent, altaque mente ingenioque acri sunt præditi.

V. Graves & acuti dolores ubi membranas corporis, ubi tenerrimas has partes infederint, ubi easdem diutius lacerant, in convulsiones, & hæ in epilepsiam terminantur. Inde est, quod plerique ex morbis, quibus dolor jungitur, sæpe in convulsiones & epilepsiam commutentur. Quod videmus in dentitione puerorum difficili, in aurium dentiumque dolore, & qui ex malo colico, iliaco, ex vermibus, ex acicula vel alia re acuta deglutita, ex punctura tendinis & vertebrarum luxatione exoritur. Idem accidit in cardialgia, quæ ex ventriculi inflammatione provenit, in contusione partium nervosarum, in arthritide intra corpus repulsa, quæ mala, cum dolorem vehementissimum comitem trahant, non raro in convulsiones ac epilepsiam transeunt.



VI. Spasmi violentiores, quales in malo hysterico, in ventriculi ac intestinorum inflammatione, item ab adsumtis venenis vel vomitoriis incaute datis corpus vexant, tandem in epilepsiam desinunt.

VII. In morbis exanthematicis, ubi serum salibus acribus causticisque gravidum est, ante eruptionem sæpe infestat epilepsia, præsertim eos, qui natura sunt sensibiliore. Eadem tamen, ubi prodierunt exanthemata, remittit, purpura variolis morbillisque id testantibus.

IIIX. Quod idem observandum est, ubi hæc exanthemata retro in corpus abierint, sive id sponte fiat, sive medicamentorum vehementia, tunc enim plerumque epilepsia inde excitatur. Adparet id in scabie in tinea capitis in erysipellate & arthritide, quæ mala intra corpus compulsa non raro epilepsia & convulsiones excipiunt.

IX. A morfu canis rabidi, abiectu venenatorum animantium nostrum fieri malum, historiæ medicæ passim adnotarunt. Incredibile vero, quam atroces quam sævi dolores à vermibus puerorum intestina corrodentibus exoriantur.

X. Omnes adfectus animique perturbationes, ira terror lætitia ex improvise incidens, vel cient epilepsiam, vel latentem rursus provocant. Animi enim motus cerebri membranas dum constringunt fortius, vel plus justo dilatant, earundem totiusque corporis vires elidunt imminuuntque.

XI. Epilepsiam pueri facile incidunt, si matres illis contigerint hystericae, vel si gravae ira excalescant.



descant. Idem malum experiuntur, si nutrices ira vel terrore commotæ, statim pueros mammis admovent. Tormina porro ex lacte acido corrupto, item meconia parum recte expurgata frequenter hanc ætatem in epilepsiam conjiciunt.

XII. Nullum vero malum magis hæreditarium est, nullum, quod facilius à parentibus ad liberos propagetur, quam hæc nostra adfectio. Radices enim hæc agit in fibrarum habitu, quæ natæ dispositæque sunt ad spasmos & distentiones suscipiendas. Inde etiam talis epilepsia, quæ per successionem quasi liberis traditur, curationem ægre admittit, sed difficillime evellitur.

XIII. Chronica epilepsia plerumque per periodos infestat, ita quidem, ut statis temporibus certisque lunæ quadris, item sub vario planetarum inter se positu, non nunquam certo die intra mensem, quo incipit, revertatur.

XIV. Habitualis & chronica in abdomine plerumque incipit, & partibus extremis. Alvus tunc flatibus distenta adstringitur, partes remotiores frigescunt, lassitudo torpor, item nausea & crebra oscitatio corpus vexant, denique auræ frigidæ sensus ab extremis partibus dorsum adficit, & primum præcordia, mox caput cerebrumque adoritur.

XV. In accessione nostri mali hæc fere signa observantur. Vasa capitis intumescunt, rubent arteriæ, valideque moventur, facies nigrescit, spuma ex ore fluit, oculique in capite fœdo spectaculo circumvolvuntur. Quæ quidem omnia abunde contestantur, sanguinem in capite cerebroque congestum esse, ibidemque stagnare.

XVI.



XVI. In dissectis epilepticorum corporibus apparet plerumque feri copia in cerebro stagnantis, sæpe quoque ejus extravasatio, aut stasis feri putridi & ichoris circa basin cerebri & spinalem medullam deprehenditur.

XVII. Ubi caput gravi vulnere percussum, ubi fractum contusumque est, ut plurimum epilepsia & convulsiones adsociantur. Quod idem accidit in apoplexia atque soporosis adfectibus, quibus idemtidem plerumque adjunguntur.

XVIII. Provocant latens hoc malum, quæcunque ex medicamentis caput implent feriuntque, uti sunt omnia narcotica suaveolentia, vinumque spirituosum. Porro quæ nervos debilitant, & membranarum robur solvunt, uti veneris intemperantia, potandique cupiditas.

XIX. Familiare est, qui huic malo opportuni sunt, feminis profluvium, idque per somnum maxime, quod Græci *ὀνιχογόρον* adpellavere. Sponte etiam in feminis seminalis liquor, item urina, alvusque fusior fertur, propter vehementem constrictionem vasorum, quæ semen ejaculantur. Nam ubi nervi adfecti sunt, patitur simul genus membranosum.

### *Curatio.*

Hæc pro diversitate causæ in hoc malo diversa instituitur, si à causâ externa, eaque violenta, à vulnere & contusione capitis oritur, serum putridum, quod intra membranas desidet, quam primum discutiendum atque resolvendum est. Cui quidem fini sequentia remedia inserviunt.

1.) Re-



1.) Recipe cinnabaris antimon. drachm. duas, olei cubebæ. macis ana guttas IV. m. f. Pulv. divid. in doses sex, & singulis quatuor horis unus ex his per aliquot dies offeratur. Detur ex hac potiuncula: Recipe aq. lil. convall. satur. & optimæ f. v. unc. tres, spir. sal. ammoniac. cum aq. parati drachm. j. m.

2.) Externe toti capiti rasō calide admoveatur facculus ex meris aromatibus constans, pulvere nempe caryophyll. cubebæ cardamom. ceterorumque.

II.) Quando epilepsia ex dolorum sævitia totum corpus pervagante exoritur, commodissimum erit, hæc adhibere.

1.) Recip. liquor. anod. miner. Dn. Præsid. drachm. duas, essent. castor. drachm. j. m. Dosis pro sexus & ætatis ratione variat. Idem medicamentum expedit passioni hystericæ & spasms.

2.) Si in principio variolarum morbillorumque hoc malum se profert, spiritus vitrioli volatilis, spiritus nitri dulcis vel solus, vel cum liquore bezoard. mixtus, it. pulv. Marchion. cum cinnabar. nat. & particula fermenti anodynæ egregium præstat levamentum.

3.) Ubi ex retro pulsæ exanthematibus, vel suppressa salutari evacuatione malum nascitur, commodissimum est, spiritum C. C. succin: cum essent. castor. & spir. salis ammon. ægroto exhibere.

III.) In puerili epilepsia, quæ ex putredine acida, vel corrupto lacte, quo nutriuntur pueri, provenit, prodest pulv. præcipit. Dn. Præsidis cum vel sine nitro compositus. Præstat porro, quod sequitur infusum laxativum.



8.) Recip. rhab. drachm. unam. aq. flor. til. lil. convall. an. unc. unam, mann. el. unc. sem. f. extractio leni calore. Colat. addi potest essent. ambræ vel moschi ad gutt. X. arcan. dupl. scrup. j. m. pro duabus dosibus.

9.) Clysteres carminativi & oleosi huic adfectui inprimis sunt adcommo-  
dati.

10.) In epilepsia habituali ac chronica sequentia commendamus.

1.) Detur tempestivum emeticum duobus ante accessionem diebus v. g. mercur. vit. solaris it. pulv. Monckii.

2.) Cauterio inuratur caput circa eam regionem, ubi coronalis atque sagittalis futura concurrunt. Prodest etiam fonticulus in capite apertus.

3.) Balf. vitæ Dn. Præf. inungatur sæpius caput, & nuchæ cum charta bibula admoveatur. Expedit etiam, emplastrum ex tacahamaka benzoe storace ladan-  
no oleo lavendul. majorani, & balsamo peruv. vertici imponere.

4.) Naribus loco errhini excipiatur salvolatile ammonicum oleo majorani corroboratum.

5.) In habituali tandem non negligendi sunt ii pulveres, qui ex sic dictis specificis adparantur. Tales sunt rasura dent. hippopotami, cran. hum. ungulæ alces pulv. secund. human. lumbric. terrestr. rasur. cranii hu-  
mani moschus &c.

### *Cautelæ & monita.*

1.) In ipso paroxysmo epilepsiæ nihil aliud agen-  
dum,



dum, quam ut spiritus salis ammon. naribus adplicetur isque cum oleo rutæ vel majorani mixtus.

2.) Balsamus vitæ Dni: Præsidis linguæ & ori infundatur, eodemque tempora & nares foveantur. Juvat etiam non mediocriter, clystere ex speciebus cephalicis alvum movere.

3.) Si quid aliud, certe V. S. in hoc casu circumspectissime est adhibenda. Vix enim hæc levamen adfert ullum, nisi plenioribus & sanguine turgentibus personis adhibeatur, it. hysterics, quæ ex suppressione mensium epilepsiam patiuntur.

4.) Ex iracundia si epilepsia excitatur, abstinere oportet ab omnibus spirituosis ac volatilibus. Utilius fuerit, pulveres absorbentes nitrosos cum rhabarb. & cremore tartari paratos offerre.

5.) Ad præcavendam epilepsiam ex incidente terrore prodest aqua liliorum convall. spirituosâ cum sale volatili oleoso vel spiritu c. c. succin. mixta, addito pauxillo cinnabaris.

6.) Opiatorum cautissimus sit usus, quod hæc ipsa, licet ad tempus malum adlevent, idem tamen postea magis exasperant, & debilitatis nervis, apoplexiam atque soporosos affectus facile excitant. In spasmodicis hysterics, quibus epilepsia jungitur, spiritus cornu cervi volatilis cum essentia anodyna mixtus utilissimus observatus fuit.

7.) Multo minus acidularum & thermarum usum in nostro casu probaverim, quæ adeo non profunt, ut potius noceant, præsertim Carolinæ. Nempe ut in omni capitis malo, ita etiam in epilepsia, quæ caput maxime



infidet, merito à prudenti medico rejiciuntur, cum satis constet, ob cruditatem, quam pariunt, eas dictos adfectos exacerbare.

8.) Idem tenendum in mercurialibus & salivatione mercuriali, ad quam nunquam vel rarissime est transeundum. Metus enim est, ne ejusmodi remediis paralysis contracturam apoplexiam guttamque serenam ægrotis arcessamus. Neque minus discriminis à martialibus, si parum caute dantur, expectaveris.

9.) Epilepsiæ, quæ circa statum morbi ingruit, egregie succurrit liquor bezoardicus, quem inde praxi clinica febrium dissertatione Dominus Præses liberaliter admodum communicavit.

10.) Utile est in omni epilepsiæ genere, alvum præstare solutiorem, & intestinorum robur eorumque motum aptis remediis conservare. Ratio hic imprimis habenda est debitæ transpirationis, quam infusis herbarum cum aqua calida optime tuemur. Laudem etiam inveniunt pillulæ polychrestæ ex herbarum amaricanthum extractis paratæ, additis balsamicis, oleo lavendulæ majoranæ, balsamoque Peruviano, cujus generis pillulæ corpori mirifice inserviunt.

Epilepsia, quæ per consensum ingravescit, linamenta ex axungiis animantium cum oleo lavendulæ anthos chamomillæ mixtis, singulare ferunt auxilium, quibus & spinalis medulla, & abdominis regio diligentissime est inungenda.

12.) Si habitualis fuerit sublata specificis, præstat venæsectione, fonticulis, laxantibus balsamicis & salibus volatilibus oleosis reliquias mali & cacochymiam expugnare.



CAPUT II.

De

*Singultu.*

OBSERVATIONES.

I.

**S**ingultus est convulsio musculorum in thorace atque diaphragmate, juncta cum violenta inspiratione, & costarum atque abdominis extrorsum dimotione.

2.) Singultus causa est transpiratio impedita, lymphæque & bilis acrimonia, item si vapores & flatus in ventriculi sinu detinentur. Unde fit, ut post purgantium ac vomitoriorum usum, post adsumptos acres & flatulentos cibos singultus excitetur.

3.) Datur singultus periodicus, qui certas horas observat, certoque anni tempore recurrit. Est hic infestus maxime hypochondriacis, & quibus sanguis per viscera abdominis tardius omnino commovetur. Idem frequentissime exercet otio deditos, & qui sanguinis missionem salutarem ipsis intermittunt, vel quibus menstrua & hæmorrhoides minus recte feruntur, & prima regio à sordibus ciborumque colluvie non bene expurgatur.

4.) Inflammationi ventriculi ubi singultus accedit, finem morbi exitum significat. Quod adnotandum etiam est in adsumto veneno, in hypercatharsi, in febribus malignis petechialibus, item



in podagra vel suppressa, vel in corpus remeante, quos adfectus plerumque singultus comitatur.

4.) Per consensum sæpe irritat, quoties aliæ partes, ut hepar diaphragma vel ileon, inflammatione obidentur. Unde in passione iliaca dysenteria, inflammatione duodeni, jejunique frequentissime conspicitur.

5.) Singultus omnis ætatis homines infestat, maxime pueros, qui ex frigore & inhibita transpiratione sæpissime hoc malum patiuntur.

6.) Quibus ex singultu mors obvenit, in iis ventriculus vel inflammatus vel sphacelo corruptus adparet, maxime circa finistrum orificium, uti anatomicæ observationes liquido demonstrant.

### *Curatio.*

1.) Non multum differt ab illa, quam in tollenda epilepsia laudavimus. Commendandus & hic spir. mineral. anodynus Dni Præs. cum essent. alexipharmaca aut spiritu C. C. vinoso mixtus, isque ex aqua menthæ spirituosâ adsumatur.

2.) Juvat, alvum clystere oleoso & carminativo præstare apertam.

3.) Constringendus est thorax vinculis, ut malum conquiescat.

4.) Ventriculi regionem externe fovere oportet linamento ex theriaca, oleo nucist. express. oleo caryophyllorum, camphora croco balsamoque Peruviano, vel ejus loco balsamum liquidum Dni Præsidis usurpetur.

Caute-



## *Cautelæ.*

1.) Quos à frigore externo singultus male habet, his unice profunt infusa calida herbarum cum sale volatili oleoso, quippe his remediis transpiratio, quæ intercepta fuit, revocatur. Debent etiam ægroti ad usum infusi leniter sudare in lectulo, & vestimentis se diligenter operire. Eadem curæ ratio opem fert iis, quos à flatibus hoc malum adoritur.

2.) Ubi ab intempestivo eoque validiore vomitorio vel purgante singultum quis sibi contraxerit, pro-  
tinus dari debet theriaca cœlestis cum aromaticis aquis, præsertim cum aqua cinnamomi.

3.) Si cholera & febribus ardentibus accedit, pulve-  
res absorbentes cum pulvere Marchionis nitro & theria-  
ca cœlesti mixti egregie auxiliantur. Commodissime  
etiam iidem dantur, si dysenterix adfectus noster super-  
venit, interpositis interdum rhabarbarinis, & clystere  
emolliente cum lacte parato.

4.) Quoties ex veneno adsumto singultus torquet,  
oleosa cum lacte copiosissime hausta præsentem opem  
pollicentur.

5.) Si ex podagra interiora repetente, item, si ex  
inflammatione ventriculi adficit, liquor bezoardicus  
præstantissimum est auxilium.

6.) Si à bili acri, qualis plerumque ventriculi &  
duodeni tunicis insidet, si ab hac, inquam, proficis-  
citur, diligens usus pulveris absorbentis nitros. convenit,  
externe sternutatio.

7.) Hypochondriacis cordi esse debet V. S. item sto-  
machica



machica remedia, pillulæ polychrestæ alvum clementer provocantes.

8.) In singultu quies est necessaria, abstineant ægri ab omni fortiore corporis motu, abstineant à potu, aëre ceterisque rebus frigidis, & in calore se contineant.

### CAPUT III.

DE

*Vomitu*

## OBSERVATIONES.

I.

**V**omitus est violenta & convulsiva contractio tunicarum tam nervearum, quam musculosarum ventriculi & duodeni cum jejuni principio, qua contenta per superiora redduntur ob motus peristaltici inversionem.

2.) Est vel idiopathicus vel symptomatikus: Ille ex materia, quæ intra partem adfectam detinetur, hic ex motus vitio in aliis partibus existente suboritur.

3.) Causam materialem vel quantitate vel qualitate metimur. Ad quantitatem pertinent cibi corrupti duri diutiusque in ventriculo retenti, item cruditates viscidæ acidæ biliosæque in stomacho sacculoque duodeni desidentes. Referri hic etiam debet cibus & potus intemperantius sumtus, & sanguis extra vasa delatus.

4.) Qualitate nocent humores intra corpus nostrum concepti, inter quos primo loco ponenda est bilis caustica & corrosiva, quæ ex admixto acido talis efficitur,

&



& in duodeno stagnat. Inde ratio patet, cur in tertiana duplici, continua, intermittente, maligna cholera & dysenteria nonnunquam vomitus exoriatur.

5.) Qualitate porro infensæ nobis sunt externæ res, quæ intra corpus admissæ pestifera plerumque mala concitant, vomitu maxime eadem insequente. Adparet id in adsumtis venenis, in peste, in miasmate contagiosorum, in morfu ictuque animantium, quibus adfectibus vomitus ceu indivulsus comes adhæret.

6.) Vomitus symptomaticus, & qui per consensum fieri amat, ex spasmo aliarum partium ut plurimum suam trahit originem, nempe ex læso cerebro, apoplexia, spasmis hypochondriacis, epilepsia, item ex mensium in feminis, gravidis præsertim, suppressione. Ejusmodi spasmi vehementia in dolore, in principio febris erysipelaceæ, in ictero, item in graviore animi perturbatione, in gaudio terrore, præsertim in ira vomitus elicitur. Neque alia causa subest, quam idem spasmus, quoties in vertigine, in navigationibus, gravem nausea stomachum exoneramus.

7.) Periculosus est, qui ex ventriculi vel intestinorum inflammatione excitatur. Si ileon inflammatum est, stercoris colorem odoremque refert. Feralis vero plerumque est niger, cujus *Hippocrates* meminit, & qui ex vitio lienis prodit, dejiciturque alvus simul nigra, & ubi hoc vomitu corripiuntur ægri, ut plurimum hoc ipso extinguuntur. Jugulatis etiam facillime, qui ex veneno adsumto ægrotos debilitat, nec vacat periculo, qui ex capite gravius læso concitatur.

8.) Vomitus porro est criticus & salutaris. Ejusmodi criticus ex mole peccantis materiæ provenire solet,



let, si alimenta vel liquida avide antea adsumpta cibi-  
que jam corrupti, item biliosi humores ejiciuntur. Quod  
idem accidit, si serum putridum ex vitio lienis vel men-  
sium suppressione ad ventriculum redundaverit, ubi  
natura salutare hoc vomitu mirifice adlevatur.

9.) Quandoque vomitus est periodicus, qui per cer-  
ta temporum spatia circuitusque invadit. Et talis  
quidem in mensium suppressione, in paroxysmo feбри-  
um observari solet. Idem matutino tempore ex di-  
gestionem prava accidit.

## *Curatio.*

Medicamenta, quæ ventriculi ac intestinorum de-  
serviunt convulsioni, adeoque vomitum infringunt, se-  
quentia celebrantur.

1.) Quæ ex mentha parantur, uti sunt aqua men-  
thæ cum vel sine vino, eaque probe concentrata, oleum  
menthæ destillatum idque purum nec terebinthina in-  
fectum.

2.) Præstant theriacalia, theriaca cœlestis, essentia  
theriacalis ceteraque.

3.) Anodyna, inter quæ eminet liquor mineral. ano-  
dyn. Dn. Præf. omnibus anodynis anteferendus, qui in  
doloribus, convulsionibus spasmisque ferocissimis divi-  
na est medicina.

4.) Vitriolacea, v. g. spiritus vitrioli rectif. spiritus vi-  
trioli dulcis, phlegma vitrioli. Ex hisce sequens mixtura  
componitur. Recipe aquæ menth. spirituos. liliorum con-  
vallium unc. unam. elæosachar. menth. drachmam semis,  
spiritus vitrioli, liquoris nostri anodyn. ana gutt. XX. eff.  
theria-



theriacal. five alexipharmacæ drachm. fem. m. f. potio.

## *Cautelæ.*

1.) Vomitus gravidarum, five primis five mediis mensibus proveniat, non est vi sistendus opiatis & adstringentibus, sed potius elixiribus stomachicis, analepticis, carminativis, ex mentha, corticibus citri nucista calamo aromatico, mastiche & spiritu vitriol. paratis iidem optime succurritur. Ducenda quoque alvus est rhabarbarinis stimulo salino acuatis.

2.) In vomitu hypochondriaco ex lienis aut hæmorrhoidum vitio, hirudines ano sunt adplicandæ vel vena secanda in talo, & primis viis subveniendum pilulis polychrestis secundum exemplar Beccherianarum confectis. Idem faciendum, si eosdem ægros vomitus niger & cruentus urget.

3.) Ex calculi dolore obortum vomitum sedat instar omnium liquor anodynus mineralis Dn. Præsidis, vel spiritus nitri dulcis bene præparatus. Conveniunt quoque clysteres oleosi, nec non oleum amygdal. dulc. interne sumtum. Si ex cerebri vel nervorum vitio oritur, balsamo nostro nervino liquido externe & interne nihil præsentius.

4.) In incipiente erysipelate ventriculi ex potu frigido in corpus calidum ingurgitato, pulvis bezoardicus item nitrosus cum pauxillo camphoræ, nec non infusa herbarum v.g. scordii betonicæ, flor. bellidis calide sumta sunt præstantissima.

5.) Vomitus in iliaca passione continuus non remittit, nisi tumor herniosus emolliatur.

6.) Si vomitus criticus ex intemperantia aut crudi-



tatibus primarum viarum oritur, non vi cohibendus est, quod etiam valet de consueto matutino vel periodico. Quando talis intempestive sedatur, maximæ anxietates subnascuntur, qui rursus, vomitu facto, conquiescunt.

## CAPUT IV.

### DE

### *Palpitatione cordis*

## OBSERVATIONES.

### I.

**P**alpitatio cordis est convulsio musculi cordis cum adnexis vasis, dum ille vehementer trahitur & è sede sua dimovetur. Differt hæc passio gradu, modo enim vehementior, modo remissior adparet. Interdum enim ita debilis est, ut ab ægroto saltem & non nisi adposita manu deprehendatur. Sæpe vero ita intenditur, ut & videri & audiri possit, quippe costas atque sternum violenter torquet atque exagitat.

2.) Nonnunquam accidit, ut in hac passione ventriculus, & quæ præcordiis subjacent, partes extrorsum cedant, convulsione vehementia ita eas concutiente. Nempe hoc in casu non intra cor solum hic convulsivus motus consistit, sed latius etiam, & in truncum arteriæ magnæ pervagatur. Quare hoc concusso, partes supra jacentes tremunt & extrorsum dimoventur.

3.) Discernitur palpitatio cordis à motu systaltico ejus vehementiore, qui febribus & acutis passionibus plerum-



plerumque obversatur. In hoc enim pulsus magnus est, vehemens junctus cum celeritate, in palpitatione vero naturali similis emicat, quandoque etiam intermittit, in thorace tamen subsultus animadvertitur.

4.) Optime distinguitur in essentialem & symptomaticam. Essentialis dicitur, quando in corde cordisque vas vitium hæret, & huc connumerandus est polypus, qui ubi inveteravit, nulli remedio cedit, sed tandem mortem infert certissimam.

5.) Notæ præsentis polypi hæ sunt. A motu corporis validiore, a scalarum adscensione, vel ubi levissime etiam sanguis commovetur, protinus palpitatione cordis invalescit, fit magna pectoris anxietas cum pulsu debili spirandique angustia, ut ægri suffocari sibi videantur.

6.) Symptomata palpitatione est, quæ adfectibus spasmodicis adsociatur. Nascitur ex primis viis, item, si nervi maxime paris vagi & intercostales male se habuerint. Tali hypochondriaci hysterici epileptici sæpissime corripiuntur.

7.) Si quid vero aliud, certe terror hunc adfectum etiam in sanis hominibus provocat. Hinc qui alias adfuerint huic malo, ex subito ac vehementi terrore facillime palpitationem sibi contrahunt.

9.) Ubi sanguis præsertim impurus circa viscera, abdominis vel præcordia stagnat, cordis palpitatione non raro producit. Unde hoc malum mirifice augebit, si ordinariæ sanguinis effusiones per menses & hæmorrhoides cessant, & adsueta venæ sectio intermittitur.



10.) Imbecilliores & quibus tenerum corpus contigit, item qui ex morbo convaluere, ex sexu vero feminæ inprimis ob genus nervosum debile huic morbo maxime sunt expositi, frequenterque eo attentantur.

11.) Minus periculosa est per se cordis palpitatio, eadem tamen, si diutius inhæret, cachexiæ hydropi aliisque morbis præbet occasionem. Ubi juvenes, qui sanguine abundant, & quibus polypus intra cordis vasa sedet, hoc adfectu laborant, frustra sibi vitæ diuturnitatem promittunt, sed syncope & apoplexia oppressi, in lectulo plerumque mortui reperiuntur.

12.) Anatomica observatione constat, pericardium in iis, qui diuturna palpitatione exercentur, copiosa turgere aqua, interdum etiam distentum valde, magnumque ipsum cor à polypo adparere.

## *Curatio.*

Curandi hujus mali ratio hæc est.

1.) Adniti oportet, ut nimia commotio partium fibrosarum & nervearum cordis & vasorum apte sopiatur.

2.) Sanguinis stasis circa cor, & pulmones impediri debet, quod commodissime perficitur, si sanguinem copiose adfluentem ab hisce partibus revocamus, sanguinis motum præstando liberiores.

3.) Causæ ceteræ, quæ malum excitant, medici prudentia sunt removendæ.

4.) Omnium vero optime sedant convulsivum cordis motum, & sanguinem eo inclinatum discutiunt an-

ti-



tispasmodica, quæ blando sulphure, vaporoso pollent. Non immerito inde prædicamus aquam liliorum convallium bene præparatam, leniterque spirituosam, item aquam melissæ Turcicæ, & qui omnes antecellit, liquor anodyn. Dn. Præs. cum spiritu C. C. vinoso mixtus, cui pauxillū olei de cedro adjiciatur. Formula talis esse potest:

Recipe liquoris anodyn. mineral. spirit. C. C. vinos. an. drachm. j. tinctur. antim. acris drachm. jj. olei de cedro gutt. VI.

5.) Externe bals. vit. Dn. Præs. chartæ bibulæ infusum cordis scorbiculo non sine fructu imponitur

## *Monita & Cautelæ.*

1.) In hypochondriacis hysteris, & ubi acido primæ viæ redundant, pulvis absorbens Wedelii cum aliquot guttis essent. castor. mixtus egregio est adjuvamento.

2.) Ubi corpora calidiora hoc malum invaserit, ubi in ejusdem accessione æstu bilique acri & fervida æger extorretur, idem pulvis usui est, adjectis nitri & cinnabaris aliquot granis. Mirum enim est, ut nitrum & cinnabaris spasmos, qui & in hoc morbo urgent, deliniant.

3.) In chronica cordis palpitatione sanguis vere & autumnio detrahendus est, quod remedii genus unice ab hoc malo præservat, & plethoricis exoptatum præstat auxilium. Idem amplectendum est, si malum ex mensium vel hæmorrhoidum suppressione nascitur.

4.) In palpitatione cordis, à quacunque etiam causa



causa proficiscatur, abstinendum omnino, præsertim in debilioribus, ab opiatīs maxime non correctis, item à frigore, nec non vino vinique spiritu, omnibus denique iis, quæ sanguinem justo vehementius commovere possunt.

6.) Nihil vero utilius, nihil magis commendari debet hoc adfectu decumbentibus, quam diligens earum pillularum usus, quæ bilem corrigunt, & extinctum balsamum ejus excitant restituntque. Quod cum in omni palpitationis genere, tum in ea inprimis custodiendum est, quæ in feminis ex menstruorum, in viris ex hypochondriorum vitio propullulat. Nec minori præsidio sunt medicamenta balsamica, quæ intestinorum robur motumque peristalticum confirmant. Ejusmodi generis sunt pillulæ, quæ ex amaris extractis gummatis resinosis cum vel sine aloe parantur, quarum exemplum præbent Beccherianæ, juvat etiam elixir nostrum balsamicum correctum.

7.) Si polypus latet, difficilis omnino cura est, auxilii tamen spes à potu Carolinarum expectanda, quæ sale alcalino, quo instructa sunt, coagulatos humores aptissime resolvunt dissipantque.

## CAPUT IV.

De

*Tussi*

# OBSERVATIONES.

I.

**T**Ussis est convulsio musculorum thoracis & diaphragmatis, cujus impetu ac violentia quæcunque hærent in pulmonum bronchiis, ejiciuntur.

2.) Cau-



2.) Causa, quæ qualitate, subtili nempe acrimonia inimica est, vel in ipso thorace ac pulmonibus, vel in partibus remotis sedem suam posuit. Inde tussis duplex omnino est, pulmonalis scilicet, quæ per se male habet, & in pulmonibus defixa est, & symptomatica, quæ propter alia mala molesta est, quibus sublatis ipsa etiam finitur.

3.) Tussis pulmonalis est, quæ phthisin, pleuritidem peripnevmoniam, ulcera pulmonum vomicas fistulas hæmoptysin catharros tubercula & lapides in pulmonibus concretos comitatur.

3.) Symptomaticæ causa non in pulmone, sed aliis partibus quærenda est. Ita si in stomacho vel in duodeno tussis oritur, stomachalis adpellatur, & non aliam agnoscit causam, quam bilem succumque pancreaticum corruptum vitiatumque. Familiaris hæc tussis est hypochondriacis, unde & hypochondriacæ fortitur nomen, item, quibus hepar inflammatione exurit.

4.) Ubi in febribus intermittentibus præsertim tertianis, tertiana præcipue continua tussis inciderit, scire licet, ex cruditatibus acidis biliosisque, quæ in ventriculo hærent, eandem provenire.

5.) Tussis ferina sicca, quæ κατ' ἐξοχὴν convulsiva nominatur, eos excruciat inprimis, quorum nervosum genus debilius languidiუსque est, & promptum paratumque ad spasmodicas contractiones. Jungitur huic vomitus interdum, interdum etiam ita invalescit, ut & in suffocationis discrimen ægri adducantur. Frequenter hac jactantur pueri, nec minus feminæ, quæ uteri strangulatione sæpius periclitantur.

D

6.) Tra



6.) Trahenda huc quoque illa tusfis, quæ ex dentitione difficili, item in gravidis occurrit, vel si nervus vel tendo circa collum & thoracem læsus est, vel fauciat. In hunc ordinem cogenda etiam, quæ ex vermibus pueros subinde adgreditur.

7.) Crebrum symptoma tusfis est morbillorum, quod ex nulla alia ratione evenit, quam ob acrimoniam lymphæ membranas pulmonum irritantis.

8.) Est tusfis humida vel sicca. Humida insignem feri viscerum copiam pituitamque movet, & in pulmonibus locum habet, quando illi relaxati nimium illam feri sanguinisque molem admittunt, cui expellendæ, cum vires defint, parum postea sufficiunt.

9.) Sicca ad symptomaticam plerumque restringenda est, & fit, cum nervi laborant, & in parte diffusa ventriculum & intestina materia mole sua urget.

10.) Tussis catharralis, quæ cum febricula & coryza incurfat, est epidemica, & dependet ab inclementia aeris & tempestatum inæqualitate. Grassatur hæc autumno & vere præsertim, & ex prohibita transpiratione corripit. Adest illa frequenter arthritidi adfectuique hypochondriaco, ob materiam sudoris non bene foras prodeuntis.

11.) Tussis datur chronica & diuturna, quæ ubi vetus facta est, difficulter eliditur. Læsionem enim viscerum partiumque solidarum, item phthisin abscessus atque apostemata prænunciat. Si hydropi accedit, spem omnino tollit sanationis, uti Hippocrates l. VI. aph. 35. sua experientia id comprobavit.

12.) Tussis etiam est periodica, quæ statis temporibus



ribus insurgit, mediaque nocte vel circa matutinum tempus suum resumit impetum. Hæc ex cruditatibus acidis biliosis, quæ in ventriculo coaluerunt, jure derivatur.

13.) Vehemens tussis infantibus herniæ, gravidisque abortus adfert periculum.

## *Curatio.*

1.) In cura hujus mali providendum est, ut primum causa morbi avertatur, deinde ut convulsio, si qua urget, si vires imminuit, & alia incommoda concitat, prudenter sopiatur.

Ut diversæ vero sunt causæ, ita diversa curatio, quam exploratis diligenter illis, facile invenimus.

I.) Si proinde pulmonalis tussis corpus occupat, demulceri debet lymphæ acrimonia, quod emollientia, demulcentia & oleosa præ ceteris omnino præstant. Exemplo fit, quod sequitur electuarium: Recipe olei amygdal. dulc. unciam unam cum dimidio, spermat. cet. drachm. ij. sacch. cant. syrup. viol. pari pondere unciam unam & sem. croci gr. XV. olei anisi macis ana gutt. X. in. f. electuarium.

2.) Acrimoniæ huic temperandæ confert infusum veronicæ cum rad. glycyrrhiz. anisoque stellato mixtum.

II.) In tussi catharrali & epidemica decurrendum est ad demulcentia, quæ supra commemoravimus. Iisdem tamen optime interposueris theriacalia v. g. essentiam alexipharmacam, cui essentia croci oleumque anisi non sine fructu admiscetur.



3.) Si tussis convulsiva, & ex nervorum vitio instat, massa pillular. de styrace, cinnabaris item liquor anodynus Dn. Præsidis vel solus vel cum spiritu C. C. mixtus auxilio præsidioque est.

4.) At si stomachalis tussis, quæ ex acido primarum viarum fit, hominem infestat, pulveres absorbentes fumere oportet, idque circa noctem maxime. Non minus convenit eleix. bals. Dn. Præsidis, sal volatile oleosum anisat. convenit. etiam, alvum solvere clementioribus purgantibus, inter quæ primum obtinent locum pillulæ polychrestæ, & laxantia ex manna rhabarbaro fol. fennæ adparata. Idem curæ genus in tussi hypochondriaca sequi oportet.

5.) In tussi inveterata, ubi solidæ partes periclitantur, flores sulphuris bals. sulphuris antimon. bals. Locatelli, myrrha in substantia cum saccharo mixta non sine fructu adhibetur.

## *Monita & Cautelæ.*

1.) In tussi stomachali & hypochondriaca abstinendum à sic dictis expectorantibus, item à dulcibus incrassantibus decoctisque. Periculum enim est, ne ex immodico illorum usu, ventriculo & intestinis læsis, dejectoque adpetitu ad cachexiam & hydropem via aperiatur.

2.) Tussi sic dictæ sanguineæ i. e. quæ plethoricis juvenibus & à sanguinis copia fit, optime subvenitur sanguinis detractio. Eadem, si hæmoptysi & mensibus suppressis tussis jungitur, summa instituitur utilitate.

3.) Inveteratæ tussi tollendæ inservit herb. veronicæ cum rad. chinæ saffr. & flor. samb. ex aqua calida de-



decocta, ejus beneficio corpus in leni sudore conservatur.

4.) Catharros exiccat tussisque materiam mirifice exhaurit abstinentia praesertim a carnibus, nimio potu, item moderatus calor, quo transpiratio inprimis adjuvatur.

5.) Noxia sunt in tussi omnia spirituosâ acidâ vina, frigus, nimia adsumtio cibi & potus, item purgantia & opiata in nimia dosi.

6.) Stomachali puerorum tussi leniore emetico egregie succurritur.

7.) Vitanda sunt in tussi validiora purgantia, non vero commodo carent clysteres & leniora laxantia, quibus venter cum non levi mali adlevatione ducitur.

8.) Si stomachalis tussis ex corrupto intra ventriculum lacte provenit, optimum est, pulveribus absorbentibus cum croco oleoque anisi mixtis malo occurrere. Nec defraudanda laude sua laxantia ex manna & rhabarbaro, quibus faburra vitiosa corpus liberatur.

9.) Ubi incipit tussis ficca, & materia nondum fatis maturuit, vel ut nostri loquuntur, cocta est, cavendum a stimulantibus, & calidis, sedativa potius & demulcentia merito hic commendantur.

10.) Ad extinguendam lymphæ acrimoniam recte dari potest lac idque cum decocto veronicæ, hac tamen cautione adhibita, ut ventriculus & intestina fordibus prius expurgentur. Nonnunquam flatus & praesertim in iis, qui ad hos proclives sunt, tussim procreant. Quo in casu praesidium petitur a salibus volatilibus oleosis, adjecto oleo anisi, item a tinctura antimonii acri, spiritu



nitri dulci, eleix. balf. Dn. Præfidis aqua carvi vel anisi spirituoſa & à carminativis linimentis.

11.) Si materia viſcida craſſa à relaxatione pulmonis per aliquot menſes ejicitur, confirmandum corpus eſt, quæ ex myrrha & ſuccino fiunt, medicamentis.

12.) Si gravidæ adficiuntur tuſſi, baſamum embryonum, elæoſacch. macis anifi optime eamdem leniunt.

## CAPUT VI.

### DE

# *Motibus convulſivis* OBSERVATIONES.

## I.

**S**unt motus convulſivi nihil aliud, quam violentæ & quæ præter voluntatem fiunt artuum diſtorſiones. Ita caput, ſpina dorſi manus pedes omnia denique membra, nunc ſurſum deorſumque nunc antrorſum retrorſumque in orbem velut quendam horum impetu ſævitiæque agitantur.

2.) Horum vero motuum tanta vis ac violentia eſt, ut vel valentiſſimo quovis renitente, vix tamen reprimantur. Quod ubi accidit, in periculo verſatur æger, ſummasque incidit anxietates atque animi deſectionem.

3.) Variam faciem hæc mala induunt. Sæpe enim inconcuſſum caput manet, & lingua & loquela bene explicatur, nec mente neque ceteris ſenſibus imminutis.

Modo



Modo etiam finiftrum, modo dextrum brachium, sæpe alterum ex cruribus, quandoque utrumque, interdum quoque tota corporis moles misere & ad formidinem visentium convellitur, ut veneficio contactus vel dæmone obsessus æger videatur.

4.) Nonnunquam maxilla inferior ita adfligitur, ut velut arcetissimo vinculo cum superiore connectatur, nec cuneis nec robustissimi cujusvis manu diducenda. Labia tremunt, dentes strident, caput vel inclinatur ad pectus, vel occiput tergo quasi illiditur, salvo incolumique animo permanente.

5.) Differt convulsivus motus à convulsione tonica, quod in hac membra rigent, inque suo loco atque situ persistunt.

6.) Illud notabile, quod in iis, qui ex hoc malo violenta morte occidunt, post mortem etiam intentum rigidumque membrum virile deprehendatur.

7.) Ut ceteræ convulsionum species sua servant tempora, ita & convulsivi motus certis temporibus mensibus diebus atque horis repetunt.

8.) Convulsionum causam veteres in repletionem atque inanitionem posuerunt. Non rejicimus hanc illorum sententiam, sed saniore sensu explicamus. Per repletionem nempe sanguinis infarctum, ejusque intra vasa detentionem intelligimus, maxime circa nervorum in spinali medulla principium. Unde non obscura esse potest causa, cur apoplexiæ lethargo phrenitidi febribus malignis variolis, ceterisque acutis malis convulsivi motus sese adgregent.

8.) Inanitio, quæ frequentior omnino causa est, nihil



hil aliud denotat, quam spasmos & convulsiones nervorum atque membranarum musculosarum. Quorum causa quidem non à mole vitiosa corpus exercente, sed à subtili acri causticaque materia irritante vel à læsione etiam externa deducitur. Huc referendi lumbrici in ventriculo & intestinis confidentes, item morsus & ictus animalium, quæ iracundia efferbuerunt. In eodem censa ponere possis bilem acrem causticam, cujus malignitas hypochondriacos & hystericas non raro in hoc malum conjicit.

10.) Si nervi nervosæque partes, item spina dorsi aut muscoli temporales sauciantur, evenit plerumque, ut convulsivi simul motus adpareant cum summo vulnerati periculo.

11.) Sæpe scorbutum atque epidemicas febres convulsivi motus comitantur, certisque familiis tanquam proprii sunt, ut hæreditate quadam ad illas pervenisse videantur.

12.) Frigus uti infestum inimicumque nervis esse consuevit, ita convulsiones facillime resuscitat, quod impedita transpiratione ab externo corporis ambitu ad interiora tanquam ad centrum sanguinem propellit, & rigidas omnino reddit fibras atque tensiores. Quod etiam de ventis septemtrionalibus, item de aeris inæqualitate diligenter adnotandum, cum certis constet experimentis, motus convulsivos his ipsis renovari.

13.) Si dissecantur extincti motibus convulsivis, vasa sanguine infarcta, pluribusque in locis præsertim circa basin cerebri, ubi incipit spinalis medulla, serum extravasatum inveneris.

Cura



## *Curatio.*

1.) Cura duplici modo institui debet, ut vel ad ipsos motus, vel causæ effectum respiciatur. Si illos intuemur, motus violentos optime sedamus externis unguentis, quibus cum spinalis medulla, tum ceteræ nervosæ partes inungantur. Exemplo erit, quod mox posuimus. Recipe axungiae humanæ taxi vulpis ana unc. semis castorei drachm. ij. ol. salviæ lavendul. menth. rosmarin. ana drachm. ij. spirit. salis ammoniac. drachm. j. m. f. unguentum.

2.) Interne dari debet spiritus C. C. volatilis probe rectificatus cum spiritu nitri dulc. & essentia anodyna mixtus. Non contemnendæ etiam virtutis est pulvis cinnabarinus cum nitro compositus.

## *Cautelæ ac monita.*

1.) Si à vermibus adfectus occupat, specifica, quæ necant & expellunt vermes, optime omnium usurpantur. Inter hæc imprimis numeramus ex mineralibus æthiopem mineralem, & mercurium dulcem, ex plantis semen fantonici, herb. scordii hyperici, tanaceti rhabarbarum, aloe absynth. allium raphanum rusticanum, & quæ ex illis miscentur, medicamenta.

2.) Quando ex læsa parte nervosa malum nascitur, nihil præstantius balsamo Dn. Præf. liquido, quod interne adhibitum blanda & anodyna, qua pollet, virtute, dolores egregie lenit, & partes corporis corroborat. Quod etiam valet, si spinalis medulla læsa fuerit, ubi externis partibus inunctum non mediocrem iisdem adfert solatium.

E

3.) Ubi



3.) Ubi ex vitio primarum viarum velut ex fonte hi motus prorumpunt, optime illorum furorem exarmant eleixiria balsamica, pillulæ polychrestæ aloeticæ, item clysteres & unguenta carminativa.

4.) Ubi in proximo malum est, nondum tamen se|exerit, juvat spiritū salis ammoniaci cum aqua liliorum convallium, item balsamū liquidum Dn. Præs. cum spiritu salis aṃoniaci mixto corpori ac nuchæ admove- re, quibus remediis adventantis impetus egregie infringitur.

5.) Ubi sanguinis abundantia in hoc malo simul adest, detrahenda oportet sanguinem, demittendi quoque pedes in aquam calidam, ut sanguis à superioribus hoc modo derivetur.

6.) Venenatorum animantium ictui optime medemur scarificatione partis adfectæ, eidemque theriaca externe imponitur. Interne spectatissimæ virtutis sunt specifica antepileptica, quæ supra commemoravimus.

7.) Si passionibus acutis convulsivi motus accedunt, cinnabarina adjecto nitro & camphora in auxilium vocare decet, quod his præfidiis illi unice evincuntur.

F I N I S.

